



Passant pe statâl a retis di Pradaman o viodarês un vecjo capanon bandonât: al è une vore malandât, al plûf dentri e, di fûr, e je la jerbe alte. Une volte o jeri a vore li e mi visi di cuant che o molavin il puest di cassîr o il caricament dai scafâi di alimentârs e detersîfs par fâ un salt li di Alfeo, il magazinîr: Cuant che lui al jere a barufâ cui camioniscj, di fûr, nô si fasevin un vuiscût... sì, parcè che al jere li, tal cabôt di Alfeo, che il vice-diretôr, d'acuardi cul nestri magazinîr, al imboscave une butilie di Seagram o di Long John. Po o davin cuatri tîrs a un balon e, come regâl par Alfeo, o tiravin cuatri pedeadis tal sô cabôt, o sieravin la puarte e o levin vie no prime di vê jemplât lis sachetis di cualchi mignon di licôr!

Intune dì di lui o lavi fûr e dentri de cele frigo, dut sudât. Finît il turno di vore, vie cjase in biciclete pai cjamps. Ta chê volte no jere la tierce corsie e dute chê speculazion. Bon, o sintivi jo un dolorut retro-sternâl ma no mi imagjinavi il piês. Bevût il gno mignon di Gin "Bifiter" o crodei di stâ miôr ma invezit la dì dopo no rivai a alçâmi dal jet, paralizât di un fuart reumatisimi. O vevi scvomençât cussì lis mês feriis!

di Milio dai cjans